



Nipilersortartut immiussinissamut 10.000 kr tikillugu tapiisummik misiliutaasumik 2022-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr-nik aningaasalerneqassaaq. Nunatsinni nipilersukkanik saqqummersitsisarnerup siuarsarnissaanik siunertalimmik. Misilittagaalersimasut nallersuinissamut atorneqassaput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut,
(Inatsisartunut ilaasortaq Aqqalu C. Jeremiassen, Atassut)
(Siullermeerneqarnera)

Kalaallit nipilersuutaannik tusarnaassallunga nuannareqaara. Ullut tamangajaasa tusarnaartarpakka. Taamaattumik aallaqqaasiutitut kalaallit nipilersortartut tamaasa qutsavigerusuppakka, piffissamik nukinnillu atuisarnerannut nipilersukkanik immiussinermuni tamatsinnut allanut nuannaarutaasumik. Ullugut pitsaaningortillugillu nuannerningortittarpasi.

Ullumikkut siullertuut oqaluuserissavarput, kalaallit nipilersugaannut tunngassuteqartoq, Inatsisartunullu ilaasortaq Aqqalu C. Jeremiassen qutsaviginiarpara ullumikkut silarsuatsinni nipilersortartut atugaasa imaannaangitsut ukkatarinerinut.

Nipilersuutit saqqummersinniarneri siaruarternenilu pisariinninngorsimavoq, akerlianilli aningaasarsiuutiginiarneri ajornarninngorsimalluni.

Demokraatit imatut isumaqanngikkaluarput, pisortat suliassarigaat qulakkiissallugu, nipilersortartut nipilersukkamik inuussutigisinnaanerat, kisiannili isumaqarluinnarpugut, pisortat pisussaaffigaaq qulakkiissallugu, innuttaasut kulturikkut sammisassanik siammasissunik peqarnissaat uani nipilersukkanik namminneq oqaatsitik atorlugit. Qulakkeeqataaffigerusupparput, tamassuma nangingneqarnissaa.

Apeqquilli unaaginnarpoq, qanoq iliorsinnaanersugut. Siunnersuuteqartup misiliuteqarnissaaq kissaatigaa, Naalakkersuisut isumaqartut, Kunstfond pigigaanni naammattoq.

Demokraatit kissaatigaaq, apeqquut paasinarsarneqartariaqartoq. Taamaattumillu naleqqutissaaq siunnersuutip Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiittitaliamut suliassanngortinneqarpat. Siunnersuutip maanakkut ilusia tunngaviginagu, siunertaraluguli sukumiisumik misissorneqarnissaa ullumikkut nipilersortartunut sinaakkutit eqqortut piginerigut aammalu saqqummersitsinernut assigisaannullu periarfissaat naammannersut. Ataatsimiittitaliaq kajumissaarusuppara allannguutissatut siunnersuutissaqaruni saqqummeeqqullugu, sinaakkutit eqqortut qulakkeerumallugit, kalaallit nipilersortartut pikkorissut sanallutillu saqqummersitsisarnera ingerlaannaqqullugu tamatsinnut nuannaarutaasumik.